

## Botoù-koad gant Aude

Anavezet eo gant holl vrezhonegerien ar ganaouenn botoù-koad dre dan savet gant ar strollad Storlok ha mouezh Bernez Tangi pa ne oa ket re raouliet c'hoazh.

« ma mije botoù-koad dre dan ,  
Me az aje da Gastell  
Da Varrakech pe da Gerlouan  
Ganto ne vijen ket pell  
Gant ma botoù koad dre dan, gant ma botoù-koad dre dan... »

### **Bremañ e vefe kaoz eus botoù-koad tredan kentoc'h.**

Rak amzer an tremenadur energetek eo ! Erfin evit an dud a-du gant an nukleel, met ur sujed all eo.

### **Perak 'ta ar botoù-koad Aude ?**

Boun, dibabet 'm eus kaozeal deus ar botoù-koad rak 'benn ar fin, evit an ekolo penn-kil a troad ma 'z on, eo dedennus seurt botoù graet gant koad – danvez ekolo ma 'z eus unan !

Ma zad-kozh en doa botoù-koad e-kreiz kêr-benn Kerne e Kemper. Met implijet e vezent gantañ evit ober war-dro ar jardrin – ur gwir jardrin peizant : pato deus un tu, sivi ha traoù lipous all evit ar vugale deus an tu all d'ar wenojenn hag a droc'he ar jardrin e daou. Ur fun 'oa er foñs da lakaat an dilhad a-istribilh da sec'hañ. Gwez-avaloù tro-dro d'ar voger – ur wezenn giwi evit un arnodenn bennak (ha lorc'h el liorzher...) ha setu tout. Ar bleunioù a oa e-penn a-raok an ti, evit plijadur ar vammgozh.

Ar botoù-koad-se zo chomet ganin pa oa marv ma zad-kozh – met re vras evidon.

**An holl Breizhiz o deus ar memes eñvorennoù sur-a-walc'h gant o zad-kozh, o tougen botoù-koad. Me soñj 'm eus deus an trouz a rae ma zad gant e votoù-koad war al leur.**

### **Reuz forzh pegement !**

Gwelet 'moa memes doare da implijout ar botoù-koad gant tad ur vignonez din. An tad a oa chomet peizant, lorc'h a oa gantañ - ha plijadur ! - o tiskouez deomp, paourkaezh plac'hed yaouank ac'hanomp - an ampartiz a roe dezhañ kerzhout war an hent skornet gant seurt botez an amzer gozh – tachoù war ar seulioù.

Soñj 'meus ennañ c'hoazh– un dremm goapaus, neuz tresadennoù Joseph-Emile Gridel warnañ – gant ur bragoù djin avat.

Perak 'ta prenañ heuzoù plastek evit ober war-dro al legumaj ? Pe ar botoù kroks heuzus ha divalav-kenañ ? Ar botoù-koad 'zo gwelloc'h hag ekolo !

Prenet 'moa ur re – met mankout a ra al loeroù din pe plouz da lakaat enno ha dreist-holl e vank al liorz h ! Mont a ran ganto war ma fondalez. N'eo ket fall dija...

